

vous ne scauiez pas en quel temps il deuoit arriuer, auourd'huy les excuses seront inutiles aux infidelles, ils seront priuez de protection. Nous auons enseigné dans l'Alcoran tout ce qui est vtile pour le salut du peuple, si tu enseignes aux hommes mes commandemens les infidelles diront que tu n'apporte que le desordre : ainsi Dieu endurcit le cœur des ignorans. Prends patience & perseuere ce que Dieu promet est infailible, garde que les incredules n'ébranlent ta perseuerance.

*Les Turcs
disent que
Locman
estoit un
grand Do-
cteur qui
uinoit au
temps de
David.*

LE CHAPITRE DE LOCMAN,

contenant trente-quatre versets,

escriit à la Mecque.

AV nom de Dieu clement & misericordieux. Je suis Dieu tres-Sage. Ces preceptes sont les preceptes du liure remply de doctrine, il conduit au chemin de salut les gens de bien qui font leurs prieres au temps ordonné, qui payent les decimes, & qui croyent au iour du iugement, ils sont conduits par leur Seigneur & seront bien-heureux. Il y a des personnes qui se moquent de ce liure, ils se deuoyent ignoramment de la loy de Dieu, & l'a mesprisent, mais ils en seront vn iour rudement chastiez : Lorsqu'on leur 'enseigné les commandemens de Dieu ils tournent le dos avec orgueil, ils ne les

veulent pas oüyr & ont les oreilles bouchées: dis-leur vous ressentirez à la fin des peines infinies: ceux qui croient en la loy de Dieu & qui font de bonnes œuvres, iouïront eternellement des delices du Paradis, ce que Dieu promet est infallible, il est tout-puissant & tout sage; il a créé le Ciel, & le soustient sans colonne qui paroissent à vos yeux, il a esleué les montagnes sur la terre pour la cheuiller & l'empescher de mouuoir; Il y a dispersé plusieurs animaux, & a enuoyé la pluye du Ciel qui a fait produire les plantes & les herbes de diuerses sortes, Voila ce que Dieu a créé, montrez-moy ce que vos Idoles ont créé, assurement les Idolastres sont euidentement deuoiez du droict chemin. Nous auons inspiré la science à Locman, & luy auons dit d'en remercier Dieu, Celuy qui remercie Dieu de ses graces fait du bien pour son ame, Dieu n'a pas affaire des ingrats, & loüange luy est deuë en tous lieux. Souuiens-toi que Locman a dit à son fils, ô mon fils, ne crois pas que Dieu ait vn compagnon, c'est vn tres grand peché: Nous auons commandé à l'homme d'honorer pere & mere, sa mere le porte avec douleur sur douleur, & le sevre en l'age de deux ans, ne sois pas ingrats des bien-faits de Dieu, honore pere & mere, tu seras vn iour deuant Dieu pour estre iugé. Si tes parents te pressent de croire que Dieu a des compagnons ne leur obeis pas, suis le chemin de ceux qui luy obeissent, les hommes seront vn iour tous assemblez deuant luy pour estre recompensez selon leurs œuvres. O mó

fils, si tu fais mal de la pesanteur d'un grain de mou-
 starde ou de la pesanteur d'un rocher, ou de la gran-
 deur du Ciel & de la Terre, Dieu le sçaura & le met-
 tra en compte, il est exact & sçait tout. O mon fils,
 fais tes oraisons au temps ordonné, fais ce qui est
 honneste & ciuil, fuis ce qui n'est pas aproué, & sois
 patient en tes aduersitez; ne regarde pas le monde
 de trauers par orgueil, ne frequente pas les superbes,
 Dieu n'aime pas les orgueilleux, obserue tes pas, mar-
 che avec modestie, parle doucement, il y a des persô-
 nes qui crient comme des asnes lors qu'ils parlent? Ne
 vois-tu pas que Dieu a créé pour les hômes toute ce qui
 est au Ciel & en la Terre, & qu'il leur donne ses gra-
 ces en general & en particulier. Il y a des ignorants
 qui disputent de la Diuinité sans raison, lors qu'on
 leur dit, faites ce que Dieu a ordonné, ils respondent,
 nous ferons ce que nous auons veu faire à nos peres,
 Ils ne considerent pas que le Diable les appelle eux
 & leurs peres aux peines de l'Enfer? Celuy qui obey à
 Dieu & fait de bonnes œuures s'attache au nœud le
 plus assure, & Dieu aura soin de luy à l'heure de sa
 fin: L'impieté des meschants ne te doit pas affliger,
 ils seront vn iour assemblez en nostre présence pour
 estre chastiez, ie leur diray tout ce qu'ils ont fait, ie
 sçay ce qui est dans le cœur des hommes, ie prolon-
 geray leur punition quelque temps sur la terre, & les
 precipiteray en l'autre monde dedans le feu d'Enfer.
 Ne leur as-tu pas demandé qui a créé le Ciel & la Ter-
 re? ils ont dit que c'est Dieu, dis leur, donc loué soit

Dieu: Neantmoins la plus grande partie d'entr'eux sont des ignorants. Tout ce qui est au Ciel & en la Terre est à Dieu, il n'a pas besoin du monde, loüange luy est deuë en tout ce qu'il fait, si tous les arbres du monde estoient plumes, & si la mer estoit ancre, ils ne comprendroient pas les effects de sa toute-puissance, il est tout puissant & sçait tout. Il vous a creés & vous fera ressusciter d'une seule parole, il entend tout & void tout. Ne considerent-ils pas que Dieu fait entrer la nuit dans le iour, & le iour dans la nuit, qu'il a creé le Soleil & la Lune qui se meuvent dans le Ciel iusques au iour ordonné, il sçait tout ce que vous faiçtes, par ce qu'il est veritablement Dieu, ceux qui inuoquent autre que luy inuoquent des choses vaines & inutiles, Dieu seul est tres haut & tout puissant, ne voids tu pas comme le nauire court sur l'eau pour marque de sa toute-Puissance à ceux qui sont recognoissans de ses graces? Lors que les ondes se sont esleuées contre les infidelles, plusieurs ont inuoqué Dieu avec resolution de suivre sa loy, lors qu'il les a sauués en terre, les vns ont perseveré à bien faire, & les autres sont retournez en leur impieté, personne ne mesprise ses commandemens que les trompeurs & les ingrats. O peuple craignez Dieu, & ayez peur du iour que le pere ne pourra pas secourir son enfant, ny l'enfant servir son pere, les promesses de Dieu sont infaillibles, ne soyez pas orgueilleux de vos richesses, ny de ce que Dieu vous toiere & vous souffre, il sçait le temps que vous ferez

chastiez, il sçait l'heure que la pluye tombera sur la terre, il sçait ce qui est dans le ventre des femmes si c'est masse ou femelle, personne ne sçait que Dieu ce que tu feras demain, personne autre que luy ne sçait en quel lieu tu mourras, il sçait tout, il sçait tout.

*LE CHAPITRE DE L'ADORA-
tion, contenant cent trente versets,
escriit à la Meque.*

AV Nom de Dieu clement & misericordieux. Je suis Dieu tres-sage. Sans doute ce liure a esté enuoyé par le Seigneur de l'Vniuers, les impies diront ils que tu l'as controuué? au contraire, c'est la verité mesme qui procede de ton Seigneur pour prescher ceux qui n'ont cy-deuant eu personne pour les instruire, peut-estre qu'ils suiuront le droict chemin. Dieu a créé le Ciel & la Terre, & tout ce qui est entr'eux en six iours, & s'est assis en son trône; qui vous protegera: & qui exaucera vos prieres autre que luy? n'y penserez-vous iamais: Il dispose de toute chose au Ciel & en la Terre, tous les hommes seront vn iour assemblés deuant luy pour estre iugez, mille ans ne sont qu'un iour deuant sa diuine Majesté, il sçait le passé, le present & le futur, il est tout-Puissant & misericordieux, il a créé toute chose pour son peuple, il a formé l'homme du limon de la terre & de
boüe